

## Flerschem iss schee!

Die Fraa unn isch sinn omm letzde Sunndaach in Raunem gewese, also nitt grad midde in Raunem, awwer uff de Raunemer Mooseit, unn sinn doo driwwwe de Uferweesch entlang geloffe bis doohie, wo frieher die Flerschemer Fähr gewese iss.

Wie isch dess dem Schorsch omm Telefon verzählt habb, hott der mich gefroochd: Was machden ihr in Raunem, wolderr nooch de Fluuchzeuche greife?

Naa, saach isch, omm Sunndaach sinn die aach gar nitt vunn Risselsem her geflooeche. Ei mir wolde mol Flerschem vunn de onner Seit her seh unn wolde aach ebbes teste.

Was wolderr donn teste?, frächt de Schorsch.

Isch gebb ze Antwort: Mir wolde mol wisse, wie merr omm bessde doohie kimmt onn die Stell medde Fähr.

Unn, frächt de Schorsch, wie kimmt merr omm bessde doohie? Unn warum wolderr donn dess wisse?

Schorsch, dess iss su kumme, dass mich omm letzde Freidaach unne omm Moo e jung Fraasche gefroochd hott: Verzeihung, ich möchte ein Foto von der Flörsheimer Mainansicht machen und denke, das kann man am besten von dort drüben. Aber wie komme ich dorthin? Unn weil ischs dere Fraa nitt rischdisch erklärn konnt, sinn merr also nooch Raunem gefahrn.

Unn jetz dusdes wisse?, frächt de Schorsch. Also was habbderr gemacht?

Mir sinn vor Raunem dorsch de ersde Kreisel su gefahrn, als wolde merr in die Waa-schoolaach odder zum Baumarkt. Die Strooß heeßt Anton-Flettner-Straße. Doo sinn merr e Stick entlang in Richtung Raunem gefahrn unn donn uff oomol hawwe merr enn Dorschgong enunner zum Moo geseh, hawwe ess Audo abgestellt unn sinn unner de Umgehungsstrooß dorsch grad onn de Moo kumme. Unn vunn doo ab leeft de Uferweesch de Moo entlang unn wennde driwwwe dorsch die gonse Weidebeem unn de Schilf dorsch uff de onner Seit die Heiser vunn Flerschem sehe dust, bissde aach schunn bald onn de ald Fährstell.

Ui jeh, seet de Schorsch, dess wär awwer dem Fraasche schlecht ze erklärn gewese.

Siehsde, saach isch, dessdeweeseche sinn merr hie unn hawwe uns alles uffgeschriwwwe.

Weil merr joo heitzedaach meddem Navi Audo fahrn dut unn den muss merr oistelle uff: Raunheim, Hafenstraße 3 oder Anton-Flettner-Straße 20. Unn vunn doo giehts wie gesaad enunner onn de Moo. Weilmerr awwer nitt meddem Audo doo enunner fahrn konn muss merr halt die Kist in de Hafe- odder Flettnerstrooß abstelle.

Wie weit isses donn vunn dere Stell bis hie zu de Fähr?, frächt de Schorsch.

Ei ebbes iwwer finhunnerd Meder. Awwer ess dut sich rendiern vunn dort aus uff Flerschem ze gugge unn dess grad jetz, weil die Beem omm Moo su schee gefärbt sinn, dess dut scheene Fotos gewwe. Isch habb aach e paar Bilder gemacht, weil dess iss, wie will isch saache, die Schokoladeseit vunn Flerschem. Unn aach dessdeweeseche iss die Oosicht uff de Internetseit vunn Flerschem ze seh. Unn wenn isch droo denke due, dasses e paar Molereie unn aach den Kupperstich „Flörsheim von Mittag her“ gewwe dut donn waaß isch, dess hott merr schunn frieher gewissd: Flerschem iss schee!

No ja, seet de Schorsch, dess missde nor noch mieh Leit wisse. E gut Geleeschenheit doodeferr iss nächstjohr de Hessedaach in Risselsem, bis doohie muss die Flerschemer Stadt werklisch e mords Reklame ferr uns mache.

Eiern Honnes